



Jumat, 15 Maret 2024

**Ogen: Keluaren 18:5-7**



*Ndahi Musa Ku Gurun Pasir*



Luar biasa peran si Sipora, selaku ndehara ras nande nandangi anak-anakna si Gersom ras Elieser. I bas jamanna nai ija kerina jabu sada rumah ntah pe kemah, amin pindah-pindah pe ia ringan (nomaden) tapi kiniersadan jabu tetap nge ijaga. Tapi jabu Musa ras Sipora enda rikut istilah sigenduari enggo *long distance relationship* (LDR). Kidauhen erkiteken dahin si arus ilakoken Musa maba kalak Israel ndarat i Mesir nari. Emaka Sipora ngenda si reh ndahi Musa ku inganna si sangana ngadi i bas sada ingan. I bas renungenta enda reh me Sipora ras bapana imam Jetero bagepe duana anakna ibabana. Janah kerehenna enda enggo me lebe iberitakenna man Musa. Alu meriah ukur ialo-alo Musa ia kerina dengen ibabana bengket ku kemahna.

Bageme paksa e, Sipora arus ndalanken tanggngjabab selaku ndehara guna mpebelin-belin anakna duana. La ipergogoina Musa siarusna ndalanken peranna selaku bapa nandangi anak-anakna. Ibere Sipora ia ras bangsa Israel guna nuju taneh sienggo ipadanken man bangsa e. Sipora sekalak ndehara si paguh, sierpengangkan, idukungen perbulangenna ndahiken tugas ras tanggungjabab si isehken Dibata man bana. La iarapkenna Musa si reh ndahi ia rasa nak-anakna tapi ia si reh ndahi Musa, ertina, iangkaina kal tanggungjabab simbelin siarus ipersan Musa selaku pemimpin nandangi bangsa e.

I bas konteks sigenduari lanai sitik jabu si kidauhen, erkiteken dahin, anak sekolah, persoalan ekonomi ntah pe ngiani orangtua. I bas sie kerina siperlu kal irakut eme, siangkan dengen kerina ilakoken alu ersada arih, guna kiniulin jabu, keluarga besar bagepe ertanggungjabab nandangi dahin. Mari si terusken perdalanan geluhta ras jabuta alu siangkan, siteken dengen mbangun kesetian sada ras sidebanna. Sipora ngelakoken si la semal ndahi perbulangen (semalna perbulangen ndahi ndehara) tapi guna kinulin ilakokenna e.